

25. marts 2014

UPA 2014/127
Ruth Heilmann

Uunga siunnersuut: Suliffeerunnermi ikiorsiissutit pillugit Inatsisartut inatsisaat nr. xx, xx 2014-imeersoq

(Inuussutissarsiornermut Aatsitassanullu Naalakkersuisoq)

Siumumit Naalakkersuisunit siunnersuutigineqartumut tungaviusut saqqummiunneqarnerat qujassutigaarput. Tassani aalajangersakkami inatsisip kalaallisoortaa danskisoortaatalu imminnut naapertuutilernissaat qulakkeerniarneqarluni, paasineqarmat suliffeerunnermi ikiorsiissutit naatsorsorneqartarnerannut tunniunneqartarnerannullu kukkusumik nutserisoqarsimanera.

Aammalu suliffeqanngitsut imaluunniit suliassarunnermi angerlartitaagallartut suliffeerunnerminni ikiorsiissutinik pisinnaatitaanerminnik annaasaqaratik sivikitsumik suliffissaminnik innersuunneqarnissaat ajornarunnaarsinneqarnissaa. Siunnerfiusut itinerusumik paasisaqarfigissallugit ataatsimiititaliami Naalakkersuisunit erseqqissaatigineqarnissaat piumasaraarput

Saqqummiussamittaaq maluginiarparput ataavartumik suliffeqarluni imminut pilersorsinnaanissamut kajumissuseqalersitsisumik iluarsaaqqittoqarnissaanut aqputissiuussisumik inatsisiliornissaq piareersaatigineqartoq, tassuunakkut suliffeqanngitsutut nalunaarsorsimasut nammineq pisuussutiginnngisaminnik suliffeqannginnerminni aningaasaqarnikkut isumannaariffigineqartarnissaannik qulakkeerinniffigineqarnissaannillu aqputissiuussinisaq siunnertarineqarluni.

Siumumit nunatsinni sulinerup imminut akilersinnaasumik ingerlanneqarnissaanik anguniagaqartumik periuseqartariaqarpugut. Saniatigulli aamma suliffeerunnermi ikiorsiisuteqartarnerup iluarsartuussiffigineqarnissaanut atatillugu suliniutit taamaattut Siumumit pisariqarluninartutut isumaqarfigaagut. Saqqummiussami inatsisip iluarsaaqqinnermut aallarnitutit taakkartorneqarnera maluginiarparput taamaattumillu qanoq ittunik iluarsaaqqinnerup malitseqarumaarnera Siumumit assut paaserusupparput.

Nunaqarpugut pisuussuteqarluartumi aammalu aalisarnermik annertunerpaamik inuussuteqarfiusumi tamakkiisumik atorluannngisatsinnik. Taamaattumik suliassarpassuaqarpoq suliarineqartussanik ataqatigiissaartumik silatusaartumillu ingerlatsisoqaruni innuttaasut suliffissaaleqinerat millisarneqarsinnaasutut periarfissaqarpoq. Aasaanerani aalisakkanik suliffissuit ilaanni sulisussaaruuttarneq aamma akuersaaruminaatsuusoq aaqqiivigisariaqar-

poq. Naapertuutinngilarmi suliffissat maneruttornerani sulisussaaleqisarneq, tassani aasaanerani akissarsiorumasut periarfissaqarsorinaraluarmata.

Inunnut sulilluarsinnaasunut inuusuttunullu pingaartumik ikiorsiissutinik tunioraaginnarneq atornagu aningaasat tunniunneqartartut sulisinneqarunik inummut inuiaqatigiinnullu iluaqutaanerumik tutsinneqassapput, ilami ikiorsiissutit maanna tunniunneqartartut eqqarsaatigalugit inuuniutaasinnaanerat annikitsuinnaapput inuillu suligunik inummut peqqinnarnepaasussaavoq sulinerup timikkut tarnikkullu tunniussaqaqartarnera ikiorsiissutinik tigusiinnarnermik naleqarnerummat isumaqarnerungaarlunilu.

Ullumikkut suliffissarsiortut immikkoortitserneqartartut nalunngilavut: Tassalu ilinniarsimasut sulisinnaalluartut, sulisinnaanngivissortut piginnaanngorsarneqartussallu. Taamatut agguataarisarnermi pitsaaqutit pitsaanngequtaasullu nalilersorneqarnissaat isummersorfingineqarnissaallu pisariaqartoq Siumumit isumaqarpugut. Kiisalu aamma kommunerujusuanngortitsinermi innuttaasut suliffissarsiortut saaffiginnittarnerisa sulissunneqartarnerisalu pitsaanerpaarsuunnginneranik oqaatiginnittarneq allatut aaqqissuuneqarsinnaanera takorloorneqarsinnaavoq.

Uani inatsisissami eqqartorneqartut soqutigintartut arlaqarput ulluinnarni ukiullu ingerlanerani suliffeqarfiit iluini nalaattakkanut ajornartorsiutaalersartunut aaqqiiniuteqanissamik imaqarmat. Soorlu aamma suliffeerunnermi angerlatitaanerit nalaani suliffeerukkallarnermi ullormi siullermit ikiorsiissutinik tunniussisoqartarnera, taannalu qangatut periuseq sapaatit akunnerini 13-nini tunniussisarneq atatiinnarneqartoq. Tassanimi aalisartut pisassaarnerminni ikiorsiissutinik pissarsisinnaasannginnerat qanoq piniarparput?

Suliffeerussimasup immikkut ittumik pilersarusiorfigineqartarnissaa soorlu piginnaanngorsaaqqiinermit pikkorissaanermit ingerlatsivigineqarnermigut, imaluunniit allamik suliffimik naleqquttumik pissarsisoqarsinnaatillugu innersuunneqartassasoq tassani ataavartumik suliffeqalernissaa anguniarlugu imminut pilersorsinnaanissaa pingaartinneqarmat Siumumit taamatut periuseqarnissaq isumaqatigaarput.

Inuup suliffissaaruttutut ikiorsiissutinik pisartagaqartup aningaasaqarnera aammalu inuttut inuunermini atukkamigut tunngassuteqartunik malinnaavigilluarneqarnissaa pisariaqarpoq, taamatut inissisimasut kommunalbestyrelsemut ilisimatitsissutaasassasut naliliiffigineqartassallutillu, taamatut kommunalbestyrelsep malinnaatinneqarluarnissaa Siumumit pissu-sissamisoortutut isumaqarfigaarput, taakkummatami akisussaaffimmik tigumiaqartut aammalu suliffinnik pilersitsinissami peqataasussat.

Taamatut Siumumit oqaaseqarluta siunnersuut Inuussutissarsiornermut Ataatsimiititaliami suliarineqartussatut innersuupparput.